

四庫全書

集部

欽定四庫全書

集部

文忠集卷二十五

六

詳校官<sub>臣</sub>唐吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>于希賢

欽定四庫全書

文忠集卷二十五

省齋文藁二十五

宋 周必大 撰

啟

答陳贛州啟

淳熙元年

吳京結綬僅接步趨閩嶠分麾幾相先後方嘆追攀之  
無路孰云迂勞之有期望千騎而欣然拜雙魚而愧甚  
恭惟某官學窮百聖才冠諸公著在詞章發雅頌典謨

之秘形諸政術適剛方柔惠之中久振譽于從班游宣  
勞于制閭雖名高而忌者衆願望重則眷愈深宜晦朔  
之再更而珪符之三易十年生聚允賴于撫摩一道韜  
鈴兼資于整暇諒兵民之胥悅即揆岳之迭居某去德  
終星傾心披霧得孟公之尺牘固竊榮觀居太丘之鄰  
城更依靜治其為感幸豈易數陳

答吉州倅趙朝奉謙啟

閱別駕之題名昔固多于賢士膺二車之遴選今復值

於通材方圖慶牘之修已辱書巾之貺恭惟某官中和  
迪德清白承家撫字有方課屢優于劇邑周旋無滯績  
常底于近畿宜仕王朝乃參郡政將令向丞相之舊治  
獲覩清獻公之遺風仕雖稍淹民則何幸某別德五年  
之久心不謂遐依仁三徑之中喜而忘寐即期良覲尚  
冀珍調

除殿撰答保昌羅縣尉維藩啟

投閒詞館久為版授之禿翁貼職書林忽廁金閨之諸

彥戴上恩之過厚揣愚分以難安豈謂某官獎善為心  
鳴謙勵志居君房之妙語責莊叟之陳人矧是頻年疊  
勤厚貺讀二十篇之策已擊節于宏才論千萬世之榮  
更服膺于絕識顧缺然而無報徒惕若以懷慚

答楊壽仁謝解啟

越在妙齡驟膺高薦賈誼用能書而稱于郡彼已後於  
二年楊侯當始冠而舉其鄉今更先于四載庭幃悅豫  
譜牒光華解元天與雋拔過人之才家傳疏通知遠之

教中都名士猶云折輩行而與游同里諸生疇敢露鋒鏖而角勝果中有司之式即觀天子之光某昔陪乃公游翰墨之場今見郎君赴功名之會身雖老矣心則欣然荷飛蓋之來臨閱摘詞而增感

答甲午解元而下啟

而下有墨書作劉德禮啟

率馬以驥來空北土之羣化鯢為鵬往運南溟之翼一時得雋萬目注觀解元先輩學有淵源行無瑕玷月旦素推其名譽秋闈果壓千英髦載窺筆下之波瀾足見

胸中之錦繡先鳴南省應同六一之無雙首唱東堂寧  
復冲之之第二方圖展慶已荷摛詞惟欣感之交懷非  
叙陳之能究

答詹狀元騷啟

淳熙二年

六事諮詢方求殫洽一言寤合遂冠倫魁喜動天顏歡  
傳士類竊以得人衆寡關世盛衰方試藝于廣廷初莫  
分其賢否逮收科于異等乃舉集于英髦觀蘇氏之遺  
書歎仁皇之多士其在鼎甲者垂四十不為公卿者纔



五人惟其獲助于皇天是以生才于王國厥今盛際與  
昔同條某官學足以窺聖經材足以應時用平日著鄉  
閭之望一朝居俊造之先事業文章其誰不信功名富  
貴夫豈易量某甫趨龍尾之階適際鰲頭之選方將贊  
喜已辱飛文佩謙柄之相先激感悰而無斁

除待制回外路啟

扶犁南畝久作老農簪筆西清復陪諸彥處非所據愧  
不自任恭惟某官才名冠于公卿治行高于方岳以牧

民之餘裕推好善之誠心曲憐起廢之蹤特借噓枯之語一緘甚寵三復多慚欽惟願治之朝實賴得賢之助鵲濡其翼乃理之常猴沐而冠夫誰不笑縱人言之姑捨豈自効之敢稽乘下澤之車將懇酬于素志重高門之地當敬避于真才因叙感悰并申善頌炎蒸甫邇啟處何如益冀珍調茂迎寵數

回胡邦衡謝龍學啟

河圖峻職已冠時髦廬阜真祠復優廩假良辰拜命賢

類均歡竊觀累聖以來最重西清之長或解天官之常  
伯或辭翰苑之主人欲賁其行始加此職然猶考平時  
之望實亦復稽在服之歲年自非光前絕後之巨公未  
有躡至徑躋之殊禮恭惟某官爽邦壽雋華國文師天  
子倚以弼諧時人望其平治應五百年之昌運久宜當  
路于王朝進十二等之清資始復假途于禁闥某倘寬  
薄責尚及班迎敬酬大貺之臨併効小夫之祝

除兵侍回新閩漕傳直閣啟

少而不武蓋素慚于甲兵老矣少文敢與知于翰墨而  
洊叨碧落之真拜再遡紫清而上征自視闕然胡能當  
此茲蓋伏遇某官推達人之志存獎善之誠力借吹噓  
助成僥倖曾感悰之未佈辱榮問之相先惜舊分符不  
獲庇身于閩嶠逮今持橐所期接武于吳京何駑駘立  
仗以常留致鸞鳳覽輝而未下公言弗釋定須季子之  
來歸私義難安正恐曼容之免去悵焉永望言莫能殫

回鑾路提刑啟云力借吹噓助成僥倖更先勤  
於榮問彌有激于懦衷愧荷交深敷宣罔既

回漢陽趙守象之啟

淳熙三年

以間平之望分漢沔之符條教一頒懽謠四達恭惟某  
官才堪盤錯學造淵源久宣撫仕之勞俶被專城之寵  
既昭民譽即簡上知獎勵有加豈特用前規而賜璽選  
掄可卜固將遵近制以為郎曾修慶之未遑辱台緘之  
先逮更敦曩契俯記衰蹤作者七人想秋闈之如昨凜  
乎六馬驚夜夢之通神感懌交懷敷宣罔既

回許校書蒼舒啟

上對鰲扉升華麟省雖三年議禮品秩已高而七畧讎書摺紳尤重詔除一下文譽四馳竊考祖宗之朝甚嚴館殿之選居中乃記言之捷徑在外仍帶職之優恩惟其舉異于司存是以必從于試可自頃典章之草例為職事之官然猶畧仿前規示存故事文儒之外他岐其可進乎禁近之聯假道而升多矣向聖上尤艱于此選計歲中特召者幾人不有英髦孰當推擇某官博文而約禮達古而通今人久望于登瀛文果成于翻水軍旅

貨財之說滾滾不窮誕謾苟且之風惓惓而論觀筆下  
之如此知胸中之浩然宜甫上於奏篇即誕頒於寵命  
蓋飫聞俎豆之事故薰炙簡編之香寧少詘于班資將  
益充其器識某方圖展慶首辱摛詞坐深欣感之懷更  
効遷陞之祝

回施贛州元之啟

遠勤碩望出領雄藩幕府一開懽謠四達恭惟某官道  
參前哲名在近臣宜入侍于邃清乃游臨于藩翰惟昔

仁皇之盛若時清獻之賢輒自諫坡徃分符竹既科條  
于鹽法乃疏鑿于贛灘嚴而不苛治有餘力泮水設瞻  
依之像遺愛未忘鬱孤存望闕之臺流風可想旋由課  
最歸振霜威公豈後身理何共貫某方圖徃記已辱貽  
緘惟欣感之交懷匪叙陳之可究

回鄭校書鑑啟

茲審萬言對策仰契宸心四部讎書旋膺除目英賢得  
路館閣生光竊觀炎漢之興無若孝文之盛既首除誅



謗妖言之罪又親策賢良極諫之人下情日通上德時  
茂賈山其言多激切善乎指事之詞梁傳所陳畧施行  
美矣移風之效惟今願治與昔同功某官端勁有隱岩  
之風博稽傳通德之業身方將于太學人皆許以諍臣  
有司徒知音于程試之間天子獨見器于對揚之頃奏  
篇甫上紙價驟增帝罷統軍之麻何慚祖烈我識尚書  
之履行紹家聲曾是登瀛寧非假道某與觀盛事猥辱  
華賤佩謙德之過優激懦衷而增愧

回趙富沙善俊啟

就錫麾符改臨藩鎮誰非典郡幾人榮奉于親輿矧是  
便家千騎鼎來于鄰壤上隆恩渥士艷寵光恭惟某官  
器度恢闊風儀峻整雖挹天潢之潤自宰閭彥之華屢  
訖外庸政頻追於召杜入居邇列班即綴于嚴徐慶禮  
未修書郵先暨意非言而可盡感與愧以交深

回周廣州自強啟

伏審輒從近侍出殿遠藩蠻夷多貪藉公玉雪之瑩法

令素弛倚公權衡之平上意則然輿情以懌恭惟某官  
文彩似舅廉平亢宗周旋九卿堅守三尺澄按數路靡  
欺四知暫領帥符行歸從橐江氛嶺稷固有望于廓清  
龍戶馬人諒益增于壯觀某尚稽馳慶先辱飛文感愧  
交懷指陳難喻

除吏侍回外路啟

侍從通班久負瘝官之責武文迭試更叨換部之榮仰  
愧主恩俯慚公議茲蓋某官仁心及物義槩光朝屢訖

外庸河決京都之潤遙分餘蔭春回朽木之枯遂使非  
才亦塵異數曾占詞之未果荷貽問以相先其在感悚  
曷勝言喻

回胡校書晉臣啟

淳熙四年

擢秀西州分光東壁英髦在列館閣增輝切觀漢朝初  
顯蜀士蓋山川鍾英傑之氣故郡國產俊明之才惜文  
華之有餘而道義之或缺王褒待詔止第頌于離宮何  
武習歌空罷歸于宣室諭意翹人者文斤邊之過校書

天祿者貽投閣之羞既何補于國家亦見輕于鄉里慨  
前規之無取嘉盛世之有人恭惟某官質厚而氣清學  
醇而文麗簫笛應雅鏗爾咸韶之音圭璋璧琮溫其郊  
廟之器比遠祇於驛召姑小試于閎才因古三流喻今  
一體極論憂勤之要兼明利害之原謂守將者皆得其  
人則兵民兩獲其利願天子以清閒之燕俾羣臣言成  
敗之機豈徒寧輯于坤維自可規恢于宇縣奏篇甫上  
茂渥遄頒聊假道於校讐即問津於華要某幸叨發策

喜際登瀛辱墜貺於長牋實銘藏於厚意屬緣移疾致  
緩馳詞尚惟高明有以原恕

除內翰回外路啟

寓直非才深慚久假出綸示寵遽忝為真觀瞻視草之  
臺羞縮扶犁之手此蓋伏遇某官忱恂推轂議論噓枯  
仁能好人已著成名之美謙有終吉更推平施之心遂  
使迂愚亦塵華要某方圖徃記首辱飛文蒙瑞霧以遊  
行固多潛潤對清風而肅揖自滌炎蒸感幸無懷敷陳

固既

回江東徐漕啟

待詔無堪久慚假寵疏榮有腴忽冒真除薄材積愧於  
妨賢厚禮首勤于削牘一謙過矣三復赧然恭惟某官  
志節清修風猷警邁學雖專於為己道不廢于愛人應  
義理之文固宜視草有澄清之志聊復登車矧嚴徐久  
在于漢廷豈頗牧不居於唐禁居慙末至日冀同升旋  
面望洋難免大方之見笑汗顏血指焉知巧匠之旁觀

感忤交深數宣罔既

回李大著堦啟

伏承策勛東觀正位承明惟此官乃侍從之階故今代以選掄為重昔人之賢者固多矣蜀士之賢者可考焉淳夫在元祐之初莊叔當紹興之末皆歷大著作之任遂為修記注之官以公之才何彼之愧承天未老固無乳媪之譏孫綽可稱允為文人之冠矧惟鉅美方萃高門父子兼並史官古今無此榮遇蓋談遷未始聯事彪



固亦非同時崔駰三世相承止于傳業應奉五葉不絕  
姑曰承家豈若無異論于三傳之中施隔屏于一堂之  
上行並儀于禁路實增煥于周行某曾直玉堂嘗勤蒞  
翰以為行慶超遷之命是故少稽酬答之言今雖愧于  
後時竊自欣于先見即期展謁聊復紆誠

回廣州周侍郎自強啟

政成南越既許借留班正西清宜膺蕃錫棠陰雖舊宸  
綽載新恭惟某官厚德鎮浮高名蓋世十城士卒久服

恩威五嶺蠻獠舉安教化惟治聲之素劬故恩渥之鼎  
新六閣外遷姑用皇朝之制三公拜入即稽漢氏之規  
修慶未遑貽緘先逮其為欣感交集襟襟

回溫州陳尚書彌作啟

起從家食薦畀藩條積平海之去思歌永嘉之來暮惠  
周兩郡眷厚九重恭惟某官禁路耆英清朝名德論思  
獻納夙聲嘉猷輔相彌縫久應大用尚煩汲黯坐嘯南  
陽竚由輻蓋之間躡置廟堂之上公言所屬召節何遲

某猥辱飛緘愧稽馳慶仰佩謙勤之德俯深感悚之懷

回隆興呂少卿企中啟

民欲精微擬上借留之請天臨昭格已疏勉勵之思棠陰不改于庇休芸閣有光於論譔十連增重九牧向方恭惟某官實茂而聲英中闕而外肆故家遺俗具知文獻之存熟路輕車見謂經綸之蘊伸體國愛君之術旌牧民御衆之才仍舊貫于南州始勤宣布次近班于東

觀實兆論思某特勤錦繡之貽愧乏瓊瑤之報遐阡邇  
陌想耕桑樂歲之餘南浦西山羨風月良辰之賞其為  
瞻頌罔既敷陳

回閩路監司啟

起家甚寵既察鄉州易節維新不踰鄰境出入按臨之  
內光華跋履之間風采聳聞懽忻周浹恭惟某官炳靈  
峻嶽尚友先賢導淵源於禮樂詩書出緒餘于文章政  
事駕言東淞固嘗廩實而貨通旋選南閩可謂車輕而

路熟念觀風之浸廣諒策足之有期率屬蓬山隔座當  
仍於近事問津禁路緇衣遂踵于前規某過辱先施深  
慙不敏雖未充于報牘尚即繼於慶辭情之所加言不  
能盡

回劉正字光祖啟

光膺宸檢進列英躔除音甫頒士類胥悅竊以詞章既  
敏初何待於考觀器業已成尚奚資于涵養然聖世重  
典常之守抑仕途榮閣館之登故先小試于禁林然後

橫翔于冊府恭惟某官譽高全蜀文中甲科有用之材  
所居可紀無窮之聞隨日以新昨萬里以賜環指三雍  
而振翼朝推俊望人嘆博聞姑騷弱水之風即扈甘泉  
之駕況審官進秩已漸于亨途而慶賚及親又符于孝  
治薦紳改觀家國同休某猥預榮觀過勤遜謝給相如  
之札欲為力以何施美崔氏之庄在貪功而豈敢其為  
愧荷罔罄數陳

回袁秘丞說友啟

輟掾西樞轉丞東壁切考在昔不輕此除肇自魏朝典  
尚書之奏事逮于梁日為天下之清官不有偉人孰當  
遴選某官風規秀整器度恢宏學探左右之原文藹中  
和之氣圭璋特達當徑薦于園丘車路逶遲姑安行于  
通道屬聞擢序良穆師言蓋聲名積日以昭彰故英俊  
望風而傾附損受以益茲可友三官惟其人固皆第一  
某適叨載筆偶際登瀛墜貺長牋愧執謙之太過披觀  
健論嘆陳義之彌高感服交深叙陳難盡

回周廣州自強啟

策勛南海晉職西清喜動羊城光騰犧畫恭惟某官節  
搃似舅廉清得君度梅嶺以分麾坐閱四年之久望松  
門而次對起居六閣之先既丕輯于民庸即端歸于帝  
所某方圖馳慶先辱飛文佩謙施之勤渠撫懦衷而愧  
感

回葉校書山啟

伏承翰墨策勛鉛黃分職動諸儒之欣艷指夷路以騰



驤竊惟人物之盛衰實在國家之教養識其大者則方寸之木可高於岑樓斲而小之則九仞之山或虧于簣土故本朝重館閣之選為當世儲公卿之材必作成于閒暇之餘乃獲用于馳驅之際某官文華掞蔚志氣激昂學有淵源嘗範模于呂氏論無骭骹由繫援于汪宗浸更事任之繁優簡聖神之眷方為世用宜並英游繙四部之書姑深涵于術業號萬人之傑行自見于功名修慶未遑貽緘先逮佩謙牧之良厚激感悰而弗諼

回中詞科周監酒泊啟

淳熙五年四月

伏承再提文筆獨冠試闈捷音一傳公論胥穆某官氣  
涵溫厚識蘊通明問學淵源挹洪波于滄海詞章挺拔  
鍾秀氣於赤城早收俊科思賈餘勇方其即席同志莫  
不避鋒逮此擅場有司為之擊節既成名於盛旦行策  
足於要津過勤賤敬之施仍叙宗盟之好藝文甚富已  
慚大布之阮咸名譽方新更愧小冠之子夏永言欣感  
交集襟懷

回姚狀元穎啟

伏承文經乙覽名冠甲科仰窺聖鑒之精俯聽輿言之  
允某官氣涵溫玉質挺修梁才華獨步于鄉閭術業先  
鳴于場屋比攄素蘊奉對青箱并色乎百家諸子之長  
持守以大學中庸之約多為貴者言同老氏之五千一  
以貫之辭異公孫之數萬既越拘攣之表宜居俊造之  
先龍首兆祥馳滄溟之驛使鯉庭拜慶破鄞水之天荒  
人知稽古之榮國享得賢之福某偶陪諸彥進侍嚴宸

環漢祖之壇初莫知于韓信擢武皇之第始共服于平  
津方欲馳詞遽勞枉駕勤厚更貽于盛贄感慚滋激于  
懦衷

回第二人葉狀元適啟

伏承言合宸衷名聯舉首初傳臚唱大契輿情某官賦  
超邁之資濟精勤之業學術淵源乎六籍詞章馳騁乎  
多聞偕俊傑以造廷悉聰明而上對切時要論自是一  
家備問陳言畧無半語人或積日精思而不足我惟一

朝伏奏而有餘究觀方冊之遺文實相上下誰謂陞簾  
之遠地曾不拘牽緊抱負之非常於功名乎何有某未  
遑展慶先辱飛文積感悚以在中豈叙陳之可究

回第三人李狀元寅仲啟

伏承拔尤蜀道得雋漢廷魏乎鼎甲之科籍甚承先之  
譽此蓋伏遇某官材資英茂問學精深慶本家餘繼夜  
光之述作美由世濟騰鼉采之輝華萬里賓王一心悟  
主謂求速成者無遠畧而顧近憂者虧永圖對揚大問

之數條理明而瞻申獻斷章之十語意婉而忠既蒙親  
擢於軒墀即並英游于館殿某猥由膚淺預聽臚傳象  
應三魁共喜去天之邇祥開五色原知賦日之工高誼  
不遺長牋先逮其為欣感交集襟懷

回趙正字彥中啟

茲承發揮鴻筆是正秘文榮動金閨光騰玉牒惟本朝  
重館閣之選蓋列聖儲經綸之才粵自中興以來間求  
公族之雋若乃網羅於科目策試於禁嚴然後用之如

今鮮矣某官學醇文古質粹氣清事業蹈韋布之難規  
模非軒冕之謂遠挹天潢之潤徑颿弱水之風羣東觀  
之諸儒踵西京之盛事留其真者河間得四方之書種  
而別之劉歆集六藝之畧少需歲月遂立功名某朽鈍  
無堪游從有賴辱長牋之俯暨嘆麗蒸之難酬愧感交  
懷指陳奚喻

除禮書兼內翰回外路啟

綴星辰之履驟被優遷窺雲霧之窓仍兼舊直冒寵靈

之有赫揆庸妄以無堪恭惟某官踐履配乎先民抑揚  
持乎公論好謙為德行賢每戒于自賢獎善存心欲達  
常思於人達迄由借譽馴致增華知章兩命之榮正慚  
非據韋陟五雲之體過辱先施在悚感以交深豈喻言  
之能究

回楊正字輔啟

茲承敷納以言譽髦斯士儒林歆艷吾黨光輝竊以有  
列于朝孰匪出羣之雋告猷于上猶須入對之時紛百



辟之斯來閱再暮而乃浹逢辰艱矣備數可乎自非深  
究治源力陳時事不以流俗毀譽移其守不以此身用  
舍貳其心則何以上不欺于吾君下無負于所學恭惟  
某官廉方秀傑博洽通明奏牘公車繼遺忠於棣萼陳  
謨諫省挹正論於冰清既自結于殊知當立登于要路  
尚從涵養益起聲華屬陪禁直之清嚴獲覘詞源之浩  
渺未遑馳慶先辱貽牋在感悚以交懷奚指陳之可喻

回江西錢運使佃啟

伏審上節閩山改轅江國按行雖舊臨遣則新恭惟某  
官雅量鎮浮訐謨經遠偕父兄而馳譽蓋自弱齡蕪文  
行以致身允為全美踐歷夙高于中禁澄清尤著于外  
臺茲屈重来旋聞愈治使乎有指務躬布於隆寬思則  
無邪足坐銷於羣枉惟公特立與衆背馳宜其上為神  
聖之深褒下使士民之信服既已續前功于一道行當  
均大惠于多方某未染慶緘遽勤榮問敬佩謙虛之意  
良深感悅之情

回劉饒州邦翰啟

乃者鄱陽歲惡黼座念深爰起舊人往頒寬詔恭惟某  
官天資豈弟政術通明外歷劇繁所居輒治內聯侍從  
厥問彌章今以萬人之英而臨千乘之國何待席煖即  
觀政成轉旱滂於豐年銷嘆愁于和氣丕輯民譽遄歸  
禁途某特枉書郵愧稽慶牘感銘之至筆舌奚周

文忠集卷二十五

欽定四庫全書

文忠集卷二十六

省齋文藁二十六

宋 周必大 撰

啟

除參政回外路監司帥守啟

淳熙七年

居六職之先已塵高位綴三卿之後更玷殊遷揣分無堪抗顏有覲恭惟某官心存獎善志在達人力行忠恕之言無懋謙冲之德游談所及既弗間於賢愚妙語相

先更曲敦于契好載循固陋曷稱褒揚第什襲以為榮  
豈一言之能叙

回在外侍從啟

六曹率屬方恪守于官箴兩社通班乃與聞於國論靜  
言忝冒厥有由來恭惟某官德業高明詞章偉麗赫奕  
禁途之雋望中和藩服之政聲經國遠猷蓋屢形于奏  
牘進賢雅志亦密導于宸衷是使非才獲陪共政某尚  
稽往記先辱飛緘佩謙施之滋隆激感悚而無斁

回紹興張閣學子彥啟

禹會雄藩吳京近輔上求良牧今得名臣恭惟某官政術高明儒猷敏茂籍甚兩朝之待從卓然三鎮之藩宣賈誼嘉謀既入陳于宣室畢公多績姑出保于東郊行趣召還首儀禁橐悵睽違之未久辱問諭之先臨愧感交懷宣敷奚既

回金陵范參政成大啟

乃者臨遣英望保釐別都待裴度於延英是為殊禮錫

韓侯於北闕何止路車既特開金殿之尊壘復親御石  
湖之扁榜恩章加厚今昔所稀茲祭戟之肇臨宜江山  
之增重恭惟某官才兼文武識洞幾微外焉極方伯連  
帥之權內則高論思獻納之譽自陪國論彌聳民瞻上  
方規恢中原寤寐極治蕭何相漢厥由居守之勞尚父  
伐商即契會朝之詠某彌年戀戀一見忽忽目方遡於  
檣烏手已披於鯉素其為感幸未易名言

回史少傅賀冬啟



伏以臺雲紀瑞圭景踐長恭惟某官道德宗工華夷碩  
望玉殿和長春之句壽同化日之舒金華敷正說之篇  
道協陽爻之長維師之拜指日以須某密企崇墉欣逢  
令旦其為善頌莫究文陳

回福州梁丞相啟

淳熙八年

黃閣上臺將宣庭渙紫宸秘職先下璽褒是宜薄海之  
交歡豈特高閣之咸喜恭惟某官事業萬夫之望文章  
多士之宗以光明雋偉之資濟溫厚洪深之德事君以

道如古大臣夢帝賚予為時良弼久贊宵衣之化暫從  
畫綉之遊威惠幹方兵民按堵鳩鳴雀乳田疇盡洗于  
棘茨海宿山行候館何憂于盜賊緊治聲之籍甚在寵  
渥以宜然裴度來朝方益彰于勛德次公復相豈或減  
于功名某嘗布慶儀未修公札茲遠勤于大貺第增愧  
於懦衷暑令方中燕臺多暇冀謹寢饗之節永垂夷夏  
之休

回娶州蕭侍郎燧啟

涓選休辰奉宣寬詔光騰星婺潤浹日畿恭惟某官巍  
登雋科允蹈賢檢士服純臣之節朝推忠讜之名義冠  
久踐于華途彌彰乃眷紆組方榮于故里已輟于蕃看  
即政成式端王覲某夙親道誼稍濶聲猷及未容投劾  
之時尚獲贊登庸之喜茲酬執訊併致忱言

回遂寧李侍郎燾啟

上眷舊德制臨大藩當印綬之被躬已歡謠之浹境恭  
惟某官全蜀先進中朝老成學術貫串乎古今才名赫

奕于中外慨念俗吏罔思治原視民瘼而弗求縱吏姦而莫問惟公久陪帝幙既已知德意志慮之詳乃今密接鄉邦必將暨中和布宣之譽佇頒漢璽歸侍虞廷念修慶之未遑辱貽緘之先逮其為感悚未易名言

回贑州劉顯學正啟

誕頒新組起鎮舊邦民吏歡迎神明欣相恭惟某官懿文華國直道事君八座升班久榮曳履三刀協夢游屈分符惟昔潁川最稱黃霸粵若再臨之日居然愈治之

聲旋被璽褒入陪鼎路孰增光於漢事諒復見于聖朝  
曾修慶之未遑辱貽緘之先逮其為愧感罔既名言

回陳侍郎岩肖啟

綴前疑之列未著新功策太史之勲乃甄舊績周章拜  
念俯仰懷慚恭惟某官禁路老成儒林先進文推巧手  
顧縮於袖間名冠善人宜優于天下不鄙疎慵之品每  
存獎與之心逮此叨踰借之褒飭正辭直筆慚無補于  
汗青俊語名章幸獲窺于尺素其為感刺豈易名言

回齊侍郎慶冑啟

欽承茂渥起領真祠既厚宸知亦榮親養恭惟某官鍾  
英海岱被遇冕旒凜然栢寺之直聲藉甚荷囊之清譽  
姑從雅志結壽宮香火之緣行奉除書上霄極星辰之  
履方圖修賀遽辱馳詞荷謙德之相先置感悰而無已  
回單侍郎夔頌德啟

恭惟某官才堪盤錯識照幾微蚤蜚官路之英聲榮踐  
禁途之貴仕

前後與上同

回紹興府王尚書希呂啟

朝辭北闕夕鎮東藩條教一新士民胥慶恭惟某官學  
諛百氏氣蓋諸公文昌喉舌之司久隆譽處於越股肱  
之郡寵寄蕃宣適一方罹水旱之災正萬乘軫旰宵之  
念諒小施于政術即丕著于事功旋奉璽褒平躋鼎路  
某倣違風度驟辱音郵在欣感以良深非叙陳之可究  
回寧國陳舍人騤啟

君子殿邦屢聞剡贊羣州承指今喜頒條轉苛虐為中

和易喋愁為謠頌民有所恃政可亟成恭惟某官德逸  
日休道深自得臨事兼後凋之節涖官無可指之瑕紅  
藥紫薇暫輟演綸之手雙溪疊嶂聊追澄練之吟惠既  
浹于潜藩福自流于京邑行膺畫節入燮宸階曾修慶  
之未遑辱摛詞之先逮其為愧感罔罄名言

又回陳舍人賀冬啟

望書雲物魯侯率屬以登臺歸設酒殽漢守移文而休  
吏匪時良牧疇踵前規恭惟某官法從名高藩方課最



宣九重之盛德措一境於泰寧茂臨來復之辰即奉遄  
歸之詔某欣逢令節阻慶賓筵記室傳封首勤華問道  
山團拜坐憶舊遊感詠交深敷陳莫盡

回江陵趙丞相啟

伏審顯奉廷揚榮更閫制非獨化行於南國抑將威震  
于北方旌纛一臨軍民交賀恭惟某官業茂變契道傳  
孔顏會千載之風雲壯九重之基業事君有道可謂大  
臣應物無心是為真宰頃辭政柄往蒞藩方若稽故常

當殿近輔然考熙朝之名相率誇畫錦於故鄉所以戀  
闕之念雖深而於渡瀘之行難輟逮稍移于圭齋彌注  
想於冕旒爰頒易鎮之恩式示朝宗之意矧異時三國  
必爭之地乃今日中原可取之途袞衣繡裳寧許姬公  
之信處命主相印行酬裴度之元功某猥辱舊知欣聞  
新渥雖馳慶牘未辦公函仰謙德之過優激懦衷而增  
愧其如忤躍未易敷云

回婆州洪舍人邁啟

茲審上圖舊德詔畀名藩宣美化於三朝浹歡謠於四境恭惟某官修名蓋世亮節傳家詞章獨步于西垣仁愛躬行于兩郡適東陽之調守契中宸之思賢爰出左符起臨右輔揚仁風於黎庶視古無慚蒙河潤于京師繼今有望少需報政即慶為公某方治書郵已勤緘翰其如欣感未易敷云

回陳給事峴啟

茲審茂隆睿眷榮踐祠庭雖才業淹留深鬱朝紳之望

而里閭燕息殆同畫繡之遊恭惟某官學術傳家風猷  
蓋世版曹瑣闥並高獻納之聲吳會少城交著蕃宣之  
績姑從均逸行慶遄歸某方欲馳詞已勤枉問其為欣  
感罔既敷陳

回婺州洪舍人邁謝進職啟

恭審疏榮芝檢候對松門旌法從之舊勞賁藩方之新  
渥恭惟某官名高夷夏氣塞天淵早被遇于宸旒久升  
華于禁橐由三字畀集賢之職雖用前規通二年躋內

閣之班抑存故實而淹屈殆更于五閏且藩宣洊歷于  
三州倣聞褒璽之頒咸謂除書之晚參裁機政已簡淵  
衷剴殄驕兵諒為餘事某間嘗修慶尚阻馳牋辱盛禮  
之來臨愧前儀之太畧其為欣感未易敷云

回鎮江錢參政良臣啟

淳熙元年

茲審起家綠野往鎮朱方千騎一臨羣情胥慶恭惟某  
官才宏而德備學粹而文雄天子以為通儒國人僉曰  
良弼茂攄經濟之術久著贊襄之功將遂冠于台衡乃

漸儀于岳牧昔以王人總餉已得軍民之歡今由政路  
分符宜增庠戟之重適千里存飢之後正九重旰食之  
時條教甫頒願憂頓釋傾耳袴襦之詠指期袞繡之歸  
某方治書郵首勤緘翰深佩撝謙之德難施愧汗之顏  
氣序益暄撫綏多暇願精調于鼎養以大慰于岩瞻

回隆興關尚書啟

伏審羣州承楷愈治于贛川十國為連就升于督府恩  
榮異甚謠頌歡然恭惟某官端重以文溫良而毅銀臺

畫省久濶步于禁嚴黃閣紫樞將平躋于輔弼修念專  
城之業屢分閫制之權惟皇眷之舊紆且民瞻之素具  
政將焉避公可遄歸某方治書郵已勤緘翰仰謙恭之  
過厚願遲鈍以知非其在感嚴曷勝言喻

除知院回外路啟

督綱條于外已叨承轄之聯參籌畫於中更忝樞機之  
任惟聖主宵衣之際豈庸夫高枕之時必能兼文武之  
資乃可重東西之府寧容腹背之鼯輒預股肱之良揣

分無堪拜恩有覲茲蓋某官儒林領袖禁路羽儀典治民藩專布愛民之政揄揚善類用為報國之忠遂使陳人存承新渥某方期廷謝即注郵籤辱大貺之先臨愧小才之不敏其為感荷固既敷陳

答福州趙侍郎汝愚啟

茲承被命典藩涓辰開府雖禁路輟直臣而去天意憮然想海邦聞良牧之來人心悅甚恭惟某官道窺聖秘名冠時髦正若孟軻切切異端之闢忠如劉向拳拳同



姓之親方謀帥之孔艱願在廷而莫可徒得汲卿之重  
式端申伯之歸既有兵民宜恩威之兼濟寧無政事使  
財用之頓寬以公之才足辦乃事少須報政便合賜環  
某方企聲猷忽勤緘翰其為欣感交集襟臆

回太平州木簷事待問啟

淳熙十年

茲承均勞禁路分鎮當塗民吏交懽江山增重恭惟某  
官名高多士忠結九重嚴徐義理之文久殫猷告召杜  
循良之守看即政成况榮奉于親庭實增光于郡紱某

尚稽馳慶先辱飛緘欣感交懷叙陳曷既

答史太保浩謝致仕啟

伏審疊貢封章懇還官政升上公之秩序荒全魏之土  
田在耆儒則敦止足之風於聖主則極褒崇之禮典冊  
既下簡編有光君臣之間可謂兩得中外之衆固宜交  
懽恭惟某官造道淵深宅心廣大學無不通故見之著  
述者多而益辨氣有所養故施之事為者久而益新兩  
持一相之權歷踐三孤之貴視物猶己愛憎泯然毋我

負人忠恕多矣是宜壽考康寧而天不靳功名終始而人不疑逮辭寵利以弗居愈覺身名之俱泰召公為保雖厥位之已崇尚父維師顧其年之未至况舊勤於分陝恐終佐于伐商某早托甄陶喜揚綸綍非敢緩廈成之賀謂當循廷謝之規今覩宸章果符輿望惟是先施之辱寧無倒置之慚迎拜匪遙欣愉更切

回金陵錢參政良臣啟

參於金鉉昔倚燮調佩以玉麟今勞居守江山增重更

士均懽恭惟某官孝友根心忠嘉致主學術淵源乎游  
夏勲庸亞匹于管蕭望實孔昭簡知彌渥惟潤昇之天  
府乃江浙之奧區並列雲屯俱為天塹然而留都非他  
鎮之比管鑰異佐符之分將期北顧之寬爰藉東郊之  
保去思來暮兩邦謠頌之交興餞舊迎新二境旌旗之  
相接若時壯觀實掩前聞少需坐席之溫旋聽沙堤之  
築某嘗馳慶問過沐華緘佩雅睠之滋隆愧前儀之太  
簡其為悚荷難盡名言

回靜江詹侍郎儀之啟

進班書殿出鎮帥垣以法從之名臣臨皇華之舊部上  
寬帝顧下愜輿情恭惟某官學造聖真才周世用久迴  
翔於遠使宜容與于近班意在本朝固當殫辰猷而告  
於后躬行君子又欲推惠澤而加乎民惟通商則疲氓  
可蘇惟崇儉則經費自足既康五管即輟四鄰某方欲  
馳詞遽蒙枉問其為欣荷未易名言

回紹興府鄭尚書丙啟

易麾藩輔決潤帝城聳威望于十連寬顧憂于九陞恭  
惟某官孤忠自信奧學躬行方榮畫繡之歸俄厚宵衣  
之眷析圭清白堯天無尺五之遙佩印銀黃漢石有肆  
千之重諒甫頒于條教即登拜於疑丞某特枉書郵仰  
銜謙柄日俟遄歸之詔坐深善頌之誠

回太平州廬州池州賀冬啟

淳熙十一年

考易而測天心既占七日之復登臺而觀雲氣又卜一  
年之豐惟時介藩宜集嘉祉恭惟某官道隨剛長德配

陽新推惠澤而加之民斂休祥而萃乎己坐迎令序行  
陟近司某方治書郵遽勤緘翰永言感頌交集襟悰

回陳丞相謝除少保啟

廷揚制麻位進孤棘既表弼諧之舊德亦酬鎮撫之新  
功上眷加隆輿情交慶恭惟某官學充天性忠締主知  
粹然道德之容足消鄙薄籍甚廟朝之望坐鎮華夷釋  
相印者十年剖藩符于兩鎮保衡之拜聖意可知台衮  
之歸人心共徯故先以右遷之寵即繼之左揆之除某

久荷殊憐欣聞異數雖敬伸於慶禮曾未達于公函茲  
屈尊崇過形謙抑三復第深于悚忭片言莫寫於勤誠

回靜江詹侍郎謝轉官啟

茲承寵頒異數榮陟崇階既酬談經儲禁之前勞亦用  
增秩璽書之故事恭惟某官學窺聖域德冠民彝入綴  
嚴徐罄朝夕論思之益進陪園綺究春秋筆削之嚴逮  
講堂甫告于終篇適邇間亦當於進律式旌儒效彌壯  
戎昭特枉華緘倍形厚禮雖佩有加之意豈勝不敏之



慚

回廬州王尚書太平州陳舍人池州陳尚書泉

州司馬侍郎賀正啟

淳熙十二年

春王三朝天地交泰若昔論思之舊為今慈惠之師茂  
履端辰允綏繁祉恭惟某官行遵賢檢功考民庸奉順  
陽和式應發生之序敷宣上德毋違寬大之書享厚福  
以難量酌輿言而易見某方修尺牘遽枉華緘佩謙施  
以滋深叙感悰而莫究

回靜江詹侍郎謝降詔獎諭啟

茲者蒙蠻底定漢詔誕頒煥綸綍之溫言獎詩書之良  
帥寵光厚甚中外榮之恭惟某官道可覺民武能威敵  
自鎮臨于交廣每綏靖于封圻蠡彼無良敢茲負固方  
調兵而薄伐俄折馘以趣降下十行一札之褒酬三令  
五申之績蓋賞歡難同于將士惟璽書可示於眷懷稽  
本朝優異之恩舉近歲濶疎之典風傳郡國名震華夷  
某托契至深窺文竊忤愧馳詞之未果荷貽問之相先

欣感交懷喻言曷究

回隆興程給事叔達啟

升華論撰申命蕃宣已跬步于西清尚悒悒於南國搢紳喜劇民吏歡騰恭惟某官昭代通儒周行先進伏蒲視草凜然風烈之高持節擁麾籍甚威聲之著雖再留于榮戟實妙簡于宸旒况甲午之題名有莆陽之近事由貼職而候松門之對旋賜環而躋荷橐之班遂以歲中參于端右既前政規摹之具在則後賢進用以何疑

某苟未汰歸深期晤語茲敬酬于公禮殊未究于私誠  
回太平州陳舍人駢啟

優考民功寵升書殿詔除甫下輿論交歡恭惟某官勁  
節端朝懿文華國禁路罄論思之益江圻蜚豈弟之聲  
承水潦之餘災著農田之顯效併酬久次特茂殊恩由  
三字而貽集仙自存故事通二年而升次對抑有成規  
嗣奉璽褒遂參枋任某苟這汰斥尚期晤言茲形拙訥  
之詞敬答緘封之貺其為欣感未易敷云

回成都留敷學正啟

峻學士之班仍行臺之寄訖寬西顧實兆東歸恭惟某  
官仁義被躬忠嘉致主自綴尚書之履屢開刺史之天  
錫鎮坤維尤高治最粵若張忠定之定與夫趙清獻之  
清人之所難公則甚易此遐方所以借留而莫捨聖主  
所以因任而不違然弼諧之功急于蕃宣左右之助重  
于遠外竊窺虛佇看即延登某比勤萬里之書深愧一  
謙之德永言欣荷難盡敷陳

答陳給事峴啟

閨臺宿望久跼端歸香火勝緣力祈因任雅懷雖愜輿  
論則那恭惟某官天賦宏才家傳奧學入侍得論思之  
體出藩收牧御之功從容祠館之游繾綣鄉閭之樂備  
臻百順坐閱三年袂挹浮丘自為謀則善矣席前宣室  
將有問焉就之某遠辱長牋備知厚眷其為欣感未易  
敷云

賀梁觀文克家年啟

淳熙十三年

伏以象測璿璣斗柄肇回於蒼陸氣和玉燭春風初入  
于東郊若時宗工宜介丕祉恭惟某官調元道著宰物  
功成暫釋政機日罄謀猷之告茂臨歲旦時臻備順之  
全方當感會于風雲迄賴平章于軍國某遲聞受謁即  
冀造門頌詠攸深叙陳莫喻

回陳丞相俊卿謝致仕啟

伏承連章請老優詔閔勞執皮帛于新班位隆亞傅易  
茅封于舊鎮地統故鄉仍秘閣之大名極宗工之異數

搢紳創見夷夏樂聞恭惟某官德博而裕于才器闕而  
冲于用以奧學高文冠多士以忠言直節居大僚為善  
未嘗近名而聲譽之歸不可遏事君未嘗枉道而爵祿  
之至不可辭周旋鈞樞弼亮神聖謀斷無乎房杜都俞  
踵乎臬轡粵去廟堂屢臨藩屏力方剛而抗疏欲追六  
一之高風年甫及而掛冠迄遂初公之雅志優游里第  
涵泳天真二疏賓客之相娛萬石子孫之甚謹謙佩六  
爻之吉悔吝不生壽居五福之先康強未艾在前輩或



難於盡善惟哲人獨享其全功然而尚父之佐武王潞  
公之師元祐皆來歸于既老豈得謝之可拘公固無心  
上猶有望某敬懷知己喜聽傳家願希驥以未能思執  
鞭而甚切仰勤榮問徒激懦衷寒律方凝燕居多豫冀  
益調於鼎食永丕聳於民瞻

回池州陳尚書良佑啟

光膺芝檢載剖竹符師帥得賢軍民致喜恭惟某官懿  
文華國直道端朝身雖遠於禁嚴望益傾于中外用詞

臣而作牧姑重九華選刺史而為公即歸兩社某近違  
風度尚曠書郵辱榮問之相先愧慶儀之不敏其為欣  
頌莫究敷陳

回靜江詹待制儀之啟

茲承奏功南國加職西清正侍從之巍班表蕃宣之異  
等恭惟某官性資端諒學識高明以愛人利物之心行  
尊主庇民之術久臨遐服迄著多庸身正令從允謂必  
躬之效政修用足宜還既庶之風姑次對于松門即延

登于槐路某雖馳慶牘未辦公函辱厚禮之先施激懦  
衷而愧甚其如欣感未易殫論

回富沙陳待制良佑啟


比審政成江國制易閩邦緊任事之加隆知眷懷之並  
厚恭惟某官禋身敬簡蹈德中和富華國之文章蘊康  
時之術業入儀禁路搢紳傳鯁挺之言出剗州符襦袴  
洽撫摩之譽乃眷初潛之鎮復煩次對之賢公既樂其  
土風民尤安于德化正惟宿望久合登庸曾是藩方固

難斂惠某尚稽慶牘已拜公函荷謙施之相先激感悰而無已

回程待制叔達啟

升華次對因任初潛觀搢紳相賀于朝知父老交歡于外恭惟某官德猷粹穆治行循良詞章為儒者之宗政術作藩侯之冠雖少稽于趣召實深簡于淵衷昔炎漢之中興有孝宣之極治若時黃霸久在潁川旋酬累歲之勞入踐三公之位上方稽古公且錫還既異時善頌

之言信而有證則後日登庸之兆理在不疑况採之士  
夫議論之公必勝彼巫史揣摩之語因酬緘貺併致誠  
祈凝沍在辰鎮臨多暇願謹養頤之節並綏視履之祥



文忠集卷二十六

欽定四庫全書

集部

文忠集卷二十七

詳校官庶吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>于希賢

欽定四庫全書

文忠集卷二十七

省齋文稿二十七

宋 周必大 撰

啟書親書狀附

除右相答洪內翰啟

淳熙十四年

備數樞庭何有籌前之畧升班鼎路寧無歇後之譏方  
切慙顏遽勤慶問眷私厚甚翰墨粲然承借重於北扉  
專主盟於南省對夜蓮而視草雖徵褒袞之榮放春榜



而登庸尚繼棣華之盛其為感頌交集襟懷敢冀高明  
曲垂炳亮

回葛尚書云

欲致感藏并伸頌禱秋官久次遠猷屢  
沃於淵衷春榜高張大用行遵于故實

答王丞相啟

倚夫子之牆昔嘗庇德次蕭何之第今復親仁方俯極  
於欣榮乃仰勤於問遺名花異果旨酒嘉餽珍餉駢羅  
饑腸饜飫坊名丙午己叨盛事之逢象近魁三更喜餘  
光之附其如謝悃併候面陳尚望鈞慈俯垂鑒察

答史太傅啟

冒處機庭久矣空餐之愧延登鼎路雜然伴食之譏知  
印累旬汗顏數四竊念某奮身孤遠逢運休明一時清  
要之官叨塵殆遍二府弼諧之地忝冒居多本圖退伏  
於民廛何意誤尸于宰事方其壯歲尚陳力之無堪矧  
此衰年豈代工之有補雖荷聖知之厚其如賢路之妨  
茲蓋伏遇某官澤被生民勲藏盟府師維尚父爵齒俱  
隆壽畀僖公熾昌未艾報國每肩於忠聚推賢尤出於

誠心將錢求人如蕭何之知韓信相才在下如仁傑之薦東之是使迂愚亦蒙選任曾占詞之未果辱流問之相先感悚交深喻言奚究

謝趙丞相頌德云

茲蓋伏遇某官澤被生民勲藏盟府累年出鎮已底多庸一節來朝

即還上衮報德每肩於忠縣遜能尤出於誠心是使迂愚亦蒙選任畫一之模具在所願恪遵居東之望滋隆更期適拜其為瞻頌罔究名言

回在外侍從啟

有常立武初何補於籌前應變守文乃旁求於歇後凌

兢拜命俯仰懷慙豈謂某官恕以取人仁於念舊故當  
持橐之日每借嘔枯之言迨此叨榮首茲贊喜三復情  
文之厚載增哀朽之光悚感交懷喻言奚究

回金陵錢參政啟

比審聖心念舊宸渥加新超秘殿之大名仍陪都之重  
寄演綸四達贊美同辭恭惟某官百行脩乎一身多文  
該乎六藝用之致主在臯夔稷契之間推以牧民出治  
杜龔黃之上久茲居守藉甚能名吏畏之如神明人倚

之如父母至於儲糧而脩歲歉捐俸以寬民祖世之所  
難公有餘裕姑疏榮而進律即趣召以柄朝既類蕭何  
晉聞中而入相必同欽若帥江表以登庸上意則然僉  
言攸屬某比勤公禮仰佩謙光適銜太極之哀遂廢小  
夫之牘其為愧悚未易名言

回太平州張閣學士子穎啟

掄才禁路分鎮當塗條教一新謠謠四起恭惟某官鍾  
英河嶽被遇冕旒獻納論思名夙高於法從中和宣布

課屢最於藩方乃眷舊邦洊煩卧理吟翰林之風月壯  
牛渚之江山即奉賜環遂榮聽履某倣瞻去旆已辱來  
緘欣感交深敷陳奚既

回史待制彌大啟

茂膺帝渥歸奉親懽正持橐之朝班領遊帷之仙籍身  
名俱泰忠孝兼全恭惟某官博洽傳家謙恭迪德秉心  
無競有真長者之風見義必為得烈丈夫之槩生雖由  
乎富貴力自致其功名久藉論思倏懷定省懇懇忱詞

之布煌煌異數之加以禁從而侍公槐何殊魯拜用金  
章而施綵服增煥萊嬉厚福方將芳徽益暢某特勤緘  
貺深戢眷存莫殫頌德之言徒積仰高之志

回宋尚書貺啟

千萬歲堯封之祝方舉壽庖三十年漢橐之英宜承霈  
渥倣還寵數胥愜輿情恭惟某官厚重䟽通精明練達  
均節著地卿之効保釐高天塹之功久樂燕閒坐綏祉  
福繫紹興之近侍率多白髮之新豈延閣之隆名未復

青氈之舊果膺簡記申錫恩綸顧異數之方來知修齡  
之益永某過勤謙柄持枉書郵在佩刻以良深非叙陳  
之可究

回福州帥賈侍郎選啟

簡求禁橐擢領藩符涓日之辰殿拜茲始恭惟某官家  
傳學術世號吏師典郡著廉平之稱登畿馳休顯之譽  
浸厚宸知之渥越躋法從之華適謀帥於七閩肆出綸  
於九陞海山環境古稱富盛之鄉冠蓋盈城今日詩書



之國佇報中和之政即還嚴近之班某過辱書函脩形  
謙柄其如悚感未易敷陳

答紹興李參政啟

伏以禹會雄藩吳京近輔上求良牧今得宗臣櫜戟再  
臨江山增重恭惟某官忠嘉致主德業端朝自卷懷於  
經綸屢申昇於符竹盖用承平之故事不離寰內之名  
城乃由東陽復殿於越去思來慕兩邦謠頌之交騰送舊  
迎新二境旌麾之相接若時壯觀實掩前聞視劉寵以

有光佇次公之入相某方修慶牘過沐華緘佩謙德之  
滋隆愧懦衰之不敏其為欣感莫究名言

答婺州蔣尚書繼周啟

茲承涓選休辰奉宣寬詔光騰星婺潤浹日畿恭惟某  
官學識該通風猷粹穆居則示安和之度動而形忠謹  
之言三獨坐之立朝寄方隆於耳目一把麾而去國郡  
猶付於股肱諒方茂於棠陰即進儀於槐路尚稽修慶  
首辱貽緘在感悚以交深非叙陳之能既

回紹興帥殿撰張侍郎杓啟

淳熙十五年

茲承光膺臨遣榮寄保釐加書殿之清資示帥藩之異  
數恭惟某官儒猷世濟家法躬行自還簪橐之班彌厚  
冕旒之眷屬漢陵之初卜咨舜牧以往臨血指汗顏肯  
有旁觀之歎盤根錯節今彰利器之功諒甫畢於因山  
即遄歸而曳履某未遑馳問先辱飛文佩刻滋深感藏  
無斁

回趙丞相啟

伏審就加恩渥因任藩符隆一品之文階增十連之壯  
觀詔除甫下衆聽咸孚竊以賜位之崇有邦所重若稽  
漢制與上公而比隆爰暨祐陵非舊弼而弗授倘任藩  
宣之重必加稱謂之殊久虛厥官今見盛舉恭惟某官  
忠醇簡亮博大通明真學丘軻之傳嘉言稷契之合身  
儀廊廟名震華夷姬旦居周莫枕底庶邦之靖召公分  
陝憇常踰四載之期雖懷歸屢貢於封章而注想彌深  
於宸扆土疆未復正需變伐之謀揆岳迭居還僕調元

之拜茲揚邦渙姑聳民瞻某常布慶緘未修公牘重荷  
能謙之施實增不敏之慙其在傾依莫勝借喻

回鄭尚書內啟

茲審茂隆睿眷申命朝廷雖德業淹留深鬱朝紳之望  
而里閭燕息殆同晝繡之遊恭惟某官望重一時學關  
百聖銓曹詞掖並高獻替之聲閩嶺稽山交著藩宣之  
績姑錫遊帷之命即陪籌幄之班某方欲馳辭已勤枉  
問其為欣感未易敷言

回富沙程尚書大昌啟

試言白玉之堂蚤陪後乘修貢紅雲之島幾作先驅遙  
聞幕府之間倍切襟期之喜恭惟某官學該上古文儷先  
秦直道忠言結知惟舊陰功惠政及物者多垂參兩社  
之聯尚屈專城之寄仁風搖扇掃殘暑于初收甘雨隨  
車轉豐年於樂土民謠既洽驛召何遲某方治書郵已  
勤緘翰不替同年之好可知異日之心欣感交懷指陳  
曷諭

回廬州鄭都承興商啟

疏榮宸扆分鎮淮壩恩惠所加兵民胥悅恭惟某官持  
身廉恪秉德靖共屢馳使傳之華久率賓臚之屬奉承  
密旨既深練于邊防典治雄藩宜具孚於德意少需報  
政即趨還朝念修慶之未皇辱貽緘之先逮其為欣感  
未易敷陳

回王尚書希呂啟

冠班邃閣均逸遊帷宸眷彌加輿情交忤恭惟某官氣

剛而裕學博而醇抱文武之全材勵功名之壯志垂升  
廊肆復擁藩麾三至淮壩民愛之如慈父獨當一面上  
倚之為長城力尋香火之盟暫適江湖之興觀禮遇之  
隆若此則延登之近可知某特枉緘書脩欽情誼其為  
感悚未易敷陳

回施樞密賀冬啟

黃鍾應氣歲臨天統之初綠野景舒身逸機衡之外居  
然百順集此一陽恭惟某官名與功偕道隨剛長日萬



幾而佐理久底殊勛畫三接以承恩行躋元輔曾空函  
於未達辱華翰之先臨感頌交深敷陳罔究

回施樞密賀年啟

淳熙十六年

厯正己酉倣紀歲年之端生當甲辰是為天地之合灼  
然亨會屬我宗工恭惟某官德與日新運隨時泰朔野  
甲兵之運昔談笑以立銷平泉花木之春今優游而坐  
享顧右府方虛於使領對昌期即奉於召書方圖七牘  
之修已沐華緘之貺其為愧頌未易殫論

拜左相回趙丞相啓

漢廷右地久矣躡居天道左旋茲焉序進內循忝冒祇  
益兢惶伏念某材無他長愚乃自信昨結登畿之綬獨  
蒙傾盖之歡慰藉揄揚殆非一日凝丞輔弼遂閱十年  
在斥免以當然乃超踰之滋甚覲顏外著感臆中深此  
蓋伏遇某官學號儒宗望推邦棟杜房事業已兼謀斷  
之長文呂聲名方趣平章之召延英既啓尚父何疑某  
過沐撫謙特貽華翰懇懇莫殫於心畫拳拳姑俟於面

陳氣序暄和征途暇豫願謹衛生之節來承注意之隆

回史丞相浩啓

廟廷右地久矣躡居天道左旋茲焉序進內循忝冒祇  
益兢惶伏念某材無他長愚乃自信每見輕於流輩獨  
倚重於儒先慰藉揄揚殆非一日凝丞輔弼遂閱十年  
在斥免以當然乃超踰之滋甚覲顏外著感臆中深此  
蓋伏遇某官盛德被躬至仁及物以厚風俗壽民生之  
脉以進人材堅邦國之基天惟監於忱誠身自安於榮

祿肆推餘蔭俯逮孤蹤某方欲馳詞已勤枉問占東垣之上相有慙垂象之光望南極之老人但致延年之祝其為愧荷罔究名言

回錢參政良臣啓

當軸處中積慚尸素正朝專面旋被恩榮忝冒滋多周章失措竊念某資身無策與世寡諧偶際運於千齡踵受知於三聖試之久矣竟無一日之長退亦宜然乃進百寮之長誰為推輓豈有夤緣此盖伏遇某官冠冕諸

儒羽儀四近久擁碧油之旆暫哦綠野之詩俯眷齊年  
嘗叨共政諒噓枯之非一宜借潤之在茲比僅達於私  
書乃特勤於公禮其為感愧罔既敷陳

除少保回錢參政啓

畫衮繡裳際兩宮之內禪篆車希冕躋左棘之崇資弗  
獲控辭惟慙虛受竊念某都無術業但有遭逢十載政  
塗皆尸祿素餐之日千齡聖旦適處中當軸之時既極  
文階遂聯孤保緊褭遷之特異由幸會之非常跼蹐拜

恩忭忭就列茲蓋伏遇某官德推輔世志切澤民紫樞  
之長方虛綠野之遊何暮俯眷趨承之舊每加獎予之  
深坐使叨塵賈超倫比某方茲入謝正爾馳詞已勤削  
牘之臨備伋鳴謙之意其為感作罔既敷陳

除判潭州謝宰執啓

紹熙三年

分麾楚境已饗起廢之恩通籍殿廷更飢懋官之典荷  
大鈞之平施慙巧匠之旁觀伏念某猗無他長而好自  
用累卵至危而弗悟奔車既殆以猶馳向非上聖加憐

羣公交助久合投身於溝壑豈容遁跡於山林而三閔  
歲陰再勤鈞冶西山卷雨甫辭畫繡之榮湘水行春復  
假青氍之寵龍光所被駑鈍奚堪此蓋伏遇某官德茂  
臯夔功崇閎散每作成於多士尤軫念於陳人諒啟擬  
之頻煩致叨塵之雜沓載念某年幾七十夙懷納祿之心  
石冒四千今愧食功之誼屬方洗印未敢叩閣始仰副  
於上恩當嗣伸於下悃尚繫鴻造訖遂丹誠其在感悰  
曷勝言喻

謝史太師啟

鍾陵起鎮畏貝錦以辭行楚甸分麾還青氍而假寵上  
恩山嶽孤跡淵冰竊念某久矣貪榮幾於患失積妨賢  
於政地紛召怨於周行向非仰恃者天且有陰為之地  
自應竄斥敢望全存何期頻歲之間疊拜除書之下湘  
波浩蕩許以承流奎殿穹窿容其通籍固出聖神之眷  
寧無培植之功茲蓋伏遇某官致主勲高經邦道廣雖榮  
歸於故里每軫念於陳人諒因入覲以噓枯遂藉裏言



而起廢然某年齡已暮政術可知脩孟子達尊者三尚  
復為臣之致況孔殘宜去者二敢當自助之留姑少副  
於宸衷即勉追於賢躅庶無負平日高山之仰亦不辜  
異時流水之知感詠交懷敷陳奚究

回隆興帥施樞密師點啟

雲飛南浦避賢路以辭行星壽長沙戴聖恩而強起鬱  
衡廬之相望粲軫翼之分光況異時聯鳳沼之榮且頻  
歲共鴻樞之政緬懷曩契載託寶鄰恭惟某官道德宗

工文章雋老結兩朝之深眷歷二府之魏班貝胄朱綬  
已奏藩方之課衮衣赤舄即宣揆席之麻某視印有初  
馳詞獨後疆連壤接葭倚玉以堪羞氣合志同蘭斷金  
而有賴永言欣懌難盡敷陳

回靜江趙侍郎思啓

春官攝貳嘗陪綿蕞之儀楚甸分麾今托賓鄰之好方  
謀注記先辱搞詞恭惟某官喬木故家儒林宿望材術  
徧揚於中外事功交著於適遐閱歲海邦已膺褒重指

期魏闕遂秉政機某甫達湘流正資河潤欽佇錫還之  
新渥首圖廷勞於近郊欣頌兼懷敷陳奚究

回江陵章侍郎森啟

山帶衡陽隸荊州而成賦地瀕湘浦會江水以朝宗古  
尾楚而附庸今夾湖而分鎮未講善鄰之寶先煩執訊  
之書恭惟某官以義理之文作詩書之帥威望比高於  
江左中和方布於渚宮簡在九重秩已增於宣帝延登  
兩社名豈減於次公乃眷疲驚久親庇賴譬諸西燕竊

寄興於東流幸以南貧復分光於北富欣愉斯至頌詠  
奚窮

回金陵余尚書端禮啓

六卿分職昔臺省之焉依十國為連今江湖之相接方  
懷思於久要欲展布於遐悰乍因簿書致稽簡牘逮辱  
先施之寵可勝不敏之慙恭惟某官莊重秉彝剛方植  
操學問成于真積猷為著于躬行峻參喉舌之司密鄰  
金鉉榮領股肱之郡仍佩玉麟期年成居守之功指日

下延登之命某身縻符竹心繫丘樊念出處之正殊恐  
游從之難必徒深企詠莫究願言

賀陳叔進除同知啟

簡求八坐延拜四鄰用掌禮之鴻儒付本兵之大柄蓋  
六藝成於夫子可辟萊俘而一編授於留侯卒籌漢幄  
何常勿聞軍旅之事夫豈不全智勇之名必惟其人乃  
振斯道恭惟某官沉謀先物古學造微令聞施諸身多  
士之所措式嘉猷告於后近臣以為表儀演絲綸於掖

垣成羽翼於望苑逮茲圖任翕爾僉諧正卿五世之昌  
已昭祖烈丞相六奇之計行闡家聲某託契有初辱知  
良厚屬充員於郡國昉依茫於廟堂欣幸攸深敷陳罔  
究

回江東漕揚秘監萬里啓

集浴鳳之池積愧車茵之泰冠沐猴於楚更慙輻蓋之  
臨辱大貺之先施負小夫之不敏恭惟某官文規姚姒  
道出羲黃直節修能衆共難者獨易耳要官美職人所

就者輒違之惟九重簡眷之深且多士依歸之久履端  
伊始泰內何疑某久濶襟期每思簪盍郡國雖分於兩  
地江湖實共於一天湘水岸花我正哦公之留詠鍾山  
雪竹公當訪我之舊游聲畫遙陳悃悃莫盡

回豐漕誼啓

六條察州千里命駕倣臨封部大播歡謠恭惟某官學  
問見乎躬行才猷存乎世濟永懷先烈歷仕三朝清風  
著於拾遺執法之時敏德高於將命談經之際緊賢孫

之是似考流輩以誰如暫屈乘輶即看持橐某一違水  
峙屢對炎蒸注目剡溪悵莫諧於訪戴庇身荆水幸將  
遂於依劉方尺牘之僅馳乃公函之疊委其為愧感罔  
究名言

回豐漕生日啟

某竊以誦哀父母之詩每感左垂之日讀寡兄弟之禮  
況當右拱之時曾未釋於端憂敢與聞於贊善伏蒙某  
官噓枯意重激潤才清篤聯事之至情致執謙之善頌



既邁吉甫穆如之作又形仲尼仁者之言申以醪牽重  
之儀物恭敬而實兼脩於未將正則而鈞有光於初度  
其為心感尚俟面陳敢冀逮茲特垂孚照

賀豐漕生日啟

紹興四年

康節編年甲辰為首屈平紀月攝提是先既聚粹於古  
今宜鍾英於德業功名富貴我固有之耆艾熾昌天方  
俾爾某念昔傾盖而如故幸茲同官而為寮三公惟其  
人願致槐庭之祝千秋無有害更伸椿算之蘄微物將

誠別緘讀聽

回江陵章侍郎賀年啟

四時之首載記上春千里而遙阻陪下客感流年而拊  
髀篤鄰好以傾心恭惟某官德望日新政功時敏吞雲  
夢之澤浩浩襟懷成章華之臺熙熙景物順履人正之  
吉適符王覲之期行度玉墀遂調金鉉某僅傳雁字過  
沐鯉書癸丑之年悵越吟之未繼正孟陬之月幸楚些  
之同歌在企詠以交深非叙陳之可究

賀葛知院拜右相啟

茲者上初命相公首奮庸國有世臣既積德有功而後  
用天將大任況旋觀歷試之甚詳方永世以無窮宜羣  
公之交賀恭惟某官躬被九德學該六經文如日星之  
麗天量若江湖之容衆儒科奕葉遠矣高曾法從三朝  
盛哉父祖粵若結綬王畿之日已皆秉鈞宰相之期然  
立朝二十年執政四五載始揚渙號序進鼎司蓋更踐  
多則望實益隆眷加厚則倚毗茲久為房為杜掩唐史

之舊聞如呂如韓繼朝家之盛事某夙陪禁直常接政  
途心雖決于歸田身豈離於播物其為欣忭罔既敷陳

回富沙陳守居仁啓

政成黃鶴之樓璽書誕布身入紅雲之島符竹增光况  
密鄰於故鄉諒深愜於雅志恭惟某官德量江海詞華  
日星近臣盡規久著演綸之譽仁者有勇更推治劇之  
才肆頒易地之恩庸示朝天之兆少需五月即綴三台  
某過沐謙勤特貽緘翰篋有潛藩之綬昔恨阻於一行

心懷同榜之英今遙思於參坐其為頌詠罔既敷陳

賀余同知端禮啟

輟總銓曹進陪籌幄兵權加重國勢彌隆恭惟某官信  
敏而恭直方以大抱經綸之奧學儲蠖濩之深知曳履  
中臺昨已期於大用佩麟留府人咸嘆其小淹逮趣召  
以來歸果奮庸而圖任夫以文武兼資之素久已全知勇  
於胸中則於樞機協贊之初足以運華夷於掌上功名  
之立日月以須臾夙幸同朝茲叨乘障逖聽郵傳之至

可稽牋敬之修其在歡悰曷勝言喻

回何運使異啟

僂直諫坡榮持漕節聞九重之臨遣函致尺書逮六轡  
之遙驅遽勤公牘厚甚綢繆之意粲然黼黻之詞三復  
以還載欣奚喻恭惟某官抱精粹高明之學濟中和敏  
達之資以善養人聚麻源之萬卷有猷告后陳騎省之  
千言茂膺禮樂之華來接湖山之勝時雨以化君子德  
風以偃小人類非俗吏之為可大賢人之業寧容淹久

即慶名歸某已薄瓜期尚依樾蔭幸晤言之有日冀保  
衛之無訐

回廣州趙侍郎彥操啟

念昔同朝恍如隔世茲楚粵雖分於湖海而郴連幸接  
於封疆屬當移疾之時浸闕傳郵之間緘書先暨感臆  
倍深恭惟某官望重閒平才高賀白蚤尹釐於天府嘗  
贊貳於地鄉近輔要藩笑談可辨南方鉅鎮綏撫何勞  
姑煩宋景之清重布君嚴之治馬人龍戶咸聽令於旌

麾豹尾鷄翹即歸班於禁從願謹衛生之節庸需趣召  
之音頌詠交懷敷陳奚究

回江陵王樞使蘭啓

起西掖之舊圖南紀之安榮戰一臨旄倪胥慶眷言下  
國本隸大邦山帶衡陽倚荊州而成賦地濱湘浦夾湖  
水以朝宗蓋通執訊之書少展附庸之敬屬嬰疴之浸  
久欲削牘以未遑逮辱先施奚勝厚愧恭惟某官德尊  
一世學貫六經正大規模由家傳而自得剛方節槩逢



主聖以彌彰言揚於侍從之時弼直於贊襄之日宜其  
入相何乃出藩昔為吳蜀之必爭今距京畿而甚邇他  
人蒞此惟政平訟理以安民宿望臨之諒器備車修而  
復古佇聽晉公之伐蔡豈徒王粲之依劉某自歎衰殘  
正靳歸老譬諸西燕久寄興於東流曾是南貧暫分光  
於北富瞻依脩極頌詠難周

上韓帥書

紹興三十年正月

某聞之士無介紹而欲求進於公卿之門其說盖有二

焉非政術足以取知則文學足以自見者也國家長育  
人材雲蒸霧集於此二者不可謂無其人然以游明公  
之庭輒銷宿愧畏無敢自飾固陋而銜驚其所長者非  
明公拒之以訑訑之色也蓋秋水雖大至北海則望洋  
而歎公翰雖巧聞偃師則不復語藝此理之常無足怪  
者今夫中臺萬務釐以六職莫難於銓衡而明公常掌  
天官矣莫重於邦賦而明公常為大司徒矣莫慎乎讞  
獄而明公常帥憲部矣不寧惟是事至繁者京兆也而

兼總於理財之餘至重者南海也而收功於談笑之際  
任至專者陪京也而開府數月百廢具舉明公之政可  
謂絕人矣文思天子聖學高妙出于生知大風之歌橫  
汾之詞雖賈馬嚴徐不足以窺其萬一而明公簪筆持  
橐出入禁闥者十年論思於朝夕相應以義理至於春  
容大篇慶成郊祀則又親屈宸翰為之賡歌明公之文  
可謂名世矣然且接士以謙待下以禮雖涇渭炯炯於  
胸次而江海其量於人蓋無所不容也粵自彌節於茲

一時僚吏智者竭其才勇者効其力官無曠職職無廢  
事獨某以無用之才居無用之官日飽齏鹽月俸數萬  
無絲髮銖黍以裨公家不汰逐之幸矣顧何以冀知遇  
也哉雖然竊有說焉昔韓愈為博士也事鄭餘慶于祭  
酒分教東都生也又事餘慶於東太學為郎都官也又  
事餘慶居守故餘慶待愈每加禮焉非以其三為屬吏  
耶如某政術文學誠不足以脩執鞭於左右獨念向者  
抱關轂下寔事明公於版曹今典教別都也又事明公

居守槩之舊比似非偶然然則受知於今日圖報於異時固不宜在門下諸從事之後矣請以是為紹介不宣

子柔弟親書

紹興三十年正月十五日

論鄉閭之盛舊云齊女之賢參氏族之華亦曰韓門之樂矧君甥舅之黨實我婚姻之家欲宿好之彌敦假良媒而往聘伏承某人令女組紉婉婉承母訓以有初而某舍弟必疆鉛槧操修讀父書而無怠是求蘭季來相掾華首夏猶清已卜御輪之日迨冰未泮茲為納幣之

時微物之儀別緘以載

韓氏齊人

回陳運使之淵狀

紹興三十年九月

伏審遠祗召節甫及修門竚承宣室之咨立邁甘泉之從已懷漫刺即望前騶欣躍之私指陳莫喻

回林宮教狀

同前

伏承駕言畿甸歸覲庭闈屬謁制之攸拘望離筵而阻邁先勤誨劄彌劇愧懷方此薄寒倍靳厚愛

回鄭編修樵狀

紹興三十一年

伏審以樞庭之掾繙藏室之經事任清高措紳欽矚顧  
惟晚進將侍下風方極欣愉遽蒙緘翰撫謙過厚積感  
惟深

回吉州王守佐先狀

隆興元年

比者恩許奉祠駕言歸里安文公之政已受一廛掃夫  
子之門將窺數仞其為欣懌豈易名言

魏漕安行遠迎狀

全前

伏審肅駕輶軒按行支郡吏民聳聽畏新使者之先聲

父老懽迎歎舊神君之尚壯豈謂幽棲之地僻亦將快  
覩於雲披欣幸居多指陳莫喻

謝林尉秀狀

同前

郊居甚僻賓謁尤稽禮尚往來先辱高軒之過出無僕  
馬未遑下澤之乘惟愧感之交懷非名言之可盡

回永新張秀才居仁狀

隆興二年

遠屈高軒寵貽長韻情文厚甚雖非衰朽之敢當詞采  
粲然足見藏修之有素莫展報瓊之好空勤垂橐之歸



愧感在中敷陳難盡

黃提刑績遠迎狀

同前

伏審持節察州揚舡及境幸與漁樵之侶將窺繡斧之光其在欣愉預盈襟抱

回劉通判德驥狀

同前

伏承言歸高隱特枉好音方策蹇以亟前悵挂颿之已遠其為愧悚莫盡名言

回吉州倅錢穉先啟

乾道元年六月二日

伏承佩印監州牽絲入境霈隨車之雨將慰暑耘瞻泥  
軾之星已形夢想推鈍未修於尺牘柄謙先枉於柔函  
喜愧交懷指陳莫喻

轉官回錢倅狀

久縻祠廩已愧空殮茲致歲成復叨平進屬嬰疴於郊  
野阻叙感於賓階敢意謙光特貽慶問其為慙荷未易  
敷陳

李提刑植遠迎狀

乾道元年十二月

伏審肅持漢節咨度周原豈圖正事於龜藏乃幸仰瞻  
於犀匿忻愉斯甚敷述奚殫

蔣丞相先狀乾道八年

比者恩予外祠道由潭府即望門牆之峻可稽名姓之  
通其在欣愉靡殫敷叙

道中謝官員訪及狀

同前

言浮小艇載涉大邦荷飛蓋之來臨悵登門之莫遂其  
為愧感交集襟悰

回葉守鹿鳴宴狀

淳熙元年

伏蒙台慈特枉華翰俾預興賢之禮且觀勸駕之光屬此抱疴阻於綴席其為愧感罔極敷陳

回鄭秘監丙狀

淳熙五年九月

特辱誨緘恪遵明詔復暴書之盛集許接武於華筵榮幸居多敷陳難喻

中元回方守狀

紹興元年

者艾熾昌之頌合俾邦侯中和宣布之詩當歌刺史孰

謂斯干之餘意反貽所部之陳人情雖本於過謙事不  
幾于倒置其為感悚未易名言

回潘倅揚倅狀

同前

海沂之康盡歌別駕之政邦國是有當頌大夫之宜何  
期賤生反辱奇語雖佩過謙之施曷勝倒置之慙

答衆官狀

同前

月宿南斗偶類韓公之生誦如清風過勤吉甫之作願  
乘除之何有視頌好以多慙願言珍藏庸結永好

中元回吉州揚倅狀

紹興二年

桑榆向晚懷六射以增歡藻翰彌新借四賢而發詠深  
為善誘非曰擬倫拂十革以珍藏激寸心而銘感

答衆官狀

同前

字余靈均悵焉初度之日俾爾耆父愧甚東方之詩意  
已重於岱嵩美更踰於錦繡其為感荷罔既敷陳

文忠集卷二十七